

編號 4 號

【姐婆个菜園教室】李秀鳳原作

放暑假咧，阿爸、阿姆送偌摻老妹轉到滿舅屋下，摻姐婆共下戴兩隻月，毋使去安親班吹冷氣關歸日，係偌兩姊妹最暢樂个事情。其實，偌兜去莊下乜愛去上課，無共樣个係，毋使讀書，逐朝晨踅等姐婆先生去菜園教室，認識各種青菜。

姐婆在菜園搭一隻菜瓜棚，棚頂一蕊一蕊个黃花生到榮榮，偌摻老妹算看通棚有幾多蕊？做得打幾多條菜瓜？姐婆笑咪咪講：「莫算啦！有兜係公花，毋會打子。」原來菜瓜花摻油桐花共樣，有公也有嫲。

偌發現姐婆个菜園，分黃色个花號¹到淦淦，除忒菜瓜以外，像瓠仔、苦瓜、笏瓜、黃瓠、長豆仔開个花都係黃色个。「這位有開茄色个花。」老妹看等一搭枝莖係深茄色个，毋知麼个菜，喊到大嫲牯聲。姐婆講這安到茄仔，若係茄仔開黃花，該就反種²咧，所以，茄色个茄仔，定著係開茄色个花。

日頭恁烈，偌摻老妹坐在菜瓜棚下奈涼，看姐婆改菜廂。老妹看生到像手指公恁長个菜瓜子連等一蕊黃花，還得人惜，就用

拈食指去揆，菜瓜子連等花緊顫，實在還生趣，偌也踅等搞。姐婆看偌兩姊妹恬索索，行兼來看。「唉哦！你兩儕仰會手恁賤，毋知菜瓜子當瓜鬼³係無？花摻子分人摸過就會消忒。」分姐婆哆，偌兩姊妹著下驚毋敢出聲。麼个係瓜鬼呀？兩個細孺仔想毋解。姐婆看出偌兩儕心肝肚个疑狐，講：「過加幾日你兜就知咧。」

無幾多日，分偌摻老妹揆過个細菜瓜噉緊來緊烏，續等連子帶花躁忒殿淨淨，原來這就係瓜鬼。姐婆講：「細人仔愛較有量兜，毋好動啊著就羊嘍⁴像瓜鬼樣恁得人惱，知無？」偌摻老妹緊領頭緊應：「知咧！」

偌摻老妹最好踅等姐婆去菜園教室，毋單淨做得認識各種青菜，還做得了解佢兜成長个特性，比上自然課還較有意思。

¹ 號：音 ho+；霸估。

² 反種：音 fan' zhung'；變種，指事情反常。

³ 瓜鬼：音 guai' gui'；指小氣、摸不得。

⁴ 羊嘍：音 rhong' vo'；嬌慣，動輒大叫。